

Na osnovu člana 39. Ustava Hercegovačko-neretvanskog kantona („Službene novine HNK“, broj: 2/98, 4/00 i 7/04), Skupština Hercegovačko-neretvanskog kantona je, na sjednici održanoj 19.12.2011. godine, donijela

Z A K O N

O GEOLOŠKIM ISTRAŽIVANJIMA HERCEGOVAČKO–NERETVANSKOG KANTONA

POGLAVLJE I - OPĆE ODREDBE

Član 1. **(Predmet Zakona)**

Ovim Zakonom se uređuju geološka istraživanja iz nadležnosti Hercegovačko – neretvanskog kantona (u daljem tekstu: Kantona), faze izvođenja geoloških istraživanja, geološka istraživanja od interesa za Kanton, finansiranje geoloških istraživanja od interesa za Kanton, istražni prostor, vođenje katastra, postupak odobravanja i šta se određuje odobrenjem za izvođenje geoloških istraživanja, odbijanje zahtjeva za odobrenje geoloških istraživanja, izvođenje geoloških istraživanja, ukidanje odobrenja za izvođenje geoloških istraživanja, postupak nakon izvedenih geoloških istraživanja, utvrđivanje rezervi mineralne sirovine, nadzor nad provođenjem Zakona, kaznene odredbe i druga pitanja vezana za geološka istraživanja na području Kantona.

Član 2. **(Značenje izraza)**

Izrazi upotrijebljeni u ovom Zakonu imaju sljedeće značenje:

„Privredno društvo - investitor“ označava privredno društvo kojem je u skladu s ovim Zakonom odobreno da ulaganjem vlastitih sredstava obezbijedi geološka istraživanja na istražnom ili eksploatacijskom prostoru;

"Privredno društvo ili javna ustanova" označava stručnu instituciju koja se bavi geološkim istraživanjima i koja je registrovana za obavljanje djelatnosti iz oblasti geoloških istraživanja u skladu s ovim i drugim zakonom;

"Inspektor" označava geološkog inspektora koji vrši nadzor nad provođenjem ovog Zakona;

"Istražni prostor" označava dio terena na kome se vrše projektovana geološka istraživanja, koji je na topografskoj osnovi definisan granicama koje prolaze kroz konturne tačke s tačno određenim koordinatama i prostire se u dubinu zemlje između vertikalnih ravni položenih kroz ucrtane strane istražnog prostora, a za koje je izdato odobrenje za istraživanje u skladu s ovim Zakonom;

"Eksploataciono polje" označava polje ograničeno prirodnim ili vještačkim granicama koje se prostire do određene dubine zemlje između vertikalnih ravni položenih kroz te granice na kome se radovi eksploatacije mogu izvoditi na osnovu izdate dozvole za eksploataciju;

"Geološka dokumentacija" označava programe i projekte geoloških istraživanja,

izvještaje i elaborate o izvršenim geološkim istraživanjima;

"Odobrenje za izvođenje geoloških istraživanja" označava rješenje kojim nadležni organ uprave, u skladu sa ovim Zakonom, odobrava privrednom društvu - investitoru da se na određenom istražnom prostoru, pod uslovima određenim rješenjem, može vršiti izvođenje geoloških istražnih radova;

„Rješenje o potvrđivanju količine i kvaliteta mineralnih sirovina“ označava rješenje koje nadležni organ uprave izdaje, po zahtjevu privrednog društva – investitora, u skladu sa ovim Zakonom, a na osnovu rezultata provedenih geoloških istraživanja i utvrđenih količina i kvaliteta mineralne sirovine;

„Odobrenje za obavljanje djelatnosti iz oblasti geoloških istraživanja“ označava rješenje – licencu kojim nadležni organ potvrđuje da privredno društvo ili javna ustanova ispunjava zakonom propisane uslove za obavljanje djelatnosti iz oblasti geologije – izrade geološke dokumentacije i korištenja laboratorije, postrojenja i opreme za geološka ispitivanja.

Član 3. (Mineralne sirovine)

Mineralnim sirovinama, u smislu ovog Zakona, smatraju se:

- a) nemetalne mineralne sirovine - abrazivi, azbesti, barit, bentonit, bijeli boksit, cementni laporci, dijatomit, dolomit, disten, feldspat, fluorit, gips, grafit, kreda, krečnjak, kvarc, kvarcni pijesak, kvarcit, i ostale silicijske sirovine, keramičke i vatrostalne gline, keramziti, škrljci, liskuni, magneziti, opekarske gline, pirofiliti, sumpor, tuf, talk, talkni škrljci, tehničko-građevinski kamen, arhitektonsko-građevinski kamen, ukrasno i poludrago kamenje, šljunak i pijesak za građevinarstvo van vodenih tokova;
- b) sve sekundarne mineralne sirovine koje se pojavljuju kao neiskorišteni ostatak dobijanja, obogaćivanja i prerade primarnih mineralnih sirovina i
- c) sve nenabrojane mineralne sirovine prirodnog porijekla koje ne spadaju u nadležnost Federacije.

POGLAVLJE II - GEOLOŠKA ISTRAŽIVANJA

Član 4. (Geološka istraživanja u smislu ovog Zakona)

Pod geološkim istraživanjima, u smislu ovog Zakona, podrazumijevaju se istraživanja i ispitivanja koja se vrše sa ciljem: upoznavanja sastava i građe zemljine kore; prognoziranja, pronalaženja i utvrđivanja ležišta mineralnih sirovina tj. količina, kvaliteta i geološko-ekonomski efekti iskorištenja čvrstih mineralnih sirovina; utvrđivanje geoloških i geomehaničkih osobina stijena i tla; utvrđivanje geoloških uslova za prostorno planiranje i projektovanje građevinskih i rudarskih objekata, zaštita terena od erozije, poplava i drugih prirodnih nepogoda i geološka ispitivanja u cilju zaštite okoliša na prostoru Kantona.

Član 5. (Faze geoloških istraživanja)

Osnovne faze geoloških istraživanja u smislu ovog Zakona su:

- a) regionalna geološka istraživanja,
- b) detaljna geološka istraživanja i
- c) eksploataciona geološka istraživanja.

Član 6. (Regionalna geološka istraživanja)

(1) Regionalna geološka istraživanja izvode se u svrhu provjere potencijalne mineralne sirovine do nivoa C1 kategorije, sa bitnim pokazateljima za fazu detaljnih geoloških istraživanja i za proučavanje hidrogeoloških i inženjersko-geoloških karakteristika na određenom širem prostoru.

(2) Podaci istraživanja iz stava (1) ovog člana čine podlogu za programiranje i projektovanje detaljnih geoloških istraživanja.

Član 7. (Detaljna geološka istraživanja)

(1) Detaljna geološka istraživanja mineralne sirovine obavljaju se na prostoru, na kome je regionalnim geološkim istraživanjima utvrđeno prisustvo ili mogućnost postojanja potencijalne mineralne sirovine. Na osnovu ovih istraživanja utvrđuje se položaj, količina, kvalitet i mogućnost eksploatacije istražene mineralne sirovine.

(2) Detaljna geološka istraživanja izvode se s ciljem proučavanja i ispitivanja detaljnih geoloških, tektonskih, metalogenetskih, hidrogeoloških, geotermalnih, inženjersko-geoloških, geofizičkih, seizmoloških, mehaničkih i drugih geoloških svojstava stijena i tla na užem prostoru i višem stepenu poznavanja geološke građe područja.

(3) Poseban vid detaljnih geoloških istraživanja je formiranje zbirki minerala, ruda, stijena i fosila u svrhu naučnog ili stručnog usavršavanja, obrazovanja, izlaganja ili čuvanja u verifikovanim (nadležnim) institucijama kao što su muzeji, instituti i fakulteti.

(4) Detaljna geološka istraživanja tla obavezno se vrše prije izrade tehničke dokumentacije za izgradnju:

- a) objekata bazne i hemijske industrije, crne i obojene metalurgije, objekata za proizvodnju celuloze i papira;
- b) objekata za preradu kože i krzna, objekata u kojima se proizvode i skladište opasne materije i sličnih objekata i postrojenja koja mogu ugroziti životnu sredinu;
- c) željezničkih pruga i pratećih objekata;
- d) postrojenja na tečni i naftni gas;

- e) auto-puteva, magistralnih i regionalnih puteva i pratećih objekata (potpornih konstrukcija, propusta i sl.);
- f) tunela;
- g) luka sa pripadajućim lučkim objektima (dokovima, valobranima, obaloutvrđnim zidovima, kranskim stazama i sl.);
- h) aerodroma i pratećih objekata;
- i) hidroelektrana i termoelektrana i pratećih objekata;
- j) visokih brana i akumulacija ispunjenih vodom, jalovinom i pepelom;
- k) dalekovoda napona 110 kV i više, trafostanica i rasklopnih postrojenja napona 35 kV i više;
- l) magistralnih gasovoda i naftovoda;
- m) međuregionalnih i regionalnih objekata vodosnadbijevanja;
- n) objekata za prečišćavanje otpadnih voda za gradska naselja;
- o) međuregionalnih i regionalnih kanalizacionih sistema;
- p) tranzitnih i glavnih telefonsko-telegrafskih centrala u njima pripadajućih postrojenja i veze između tih centrala;
- q) objekata od posebnog interesa za odbranu zemlje;
- r) objekata radio-difuznih stanica i radio-relejnih sistema;
- s) objekata u kojima se sakuplja veći broj lica (pozorišne, bioskopske, sportske, izložbene i slične dvorane), fakulteta, instituta, škola, predškolskih ustanova, bolnica, stadiona, hotela, poslovnih i stambenih objekata površine preko 1000 m² i objekata koji imaju četiri i više nadzemnih etaža, autobuskih i željezničkih stanica;
- t) vjerskih objekata;
- u) silosa i vodotornjeva svih vrsta;
- v) hala svih tipova (industrijskih, privrednih, sportskih, i dr.);
- w) drumskih, željezničkih i pješačkih mostova;
- x) sanitarnih deponija otpadaka i postrojenja za tretman čvrstog i opasnog otpada;
- y) svih vrsta industrijskih objekata;
- z) stanica i postrojenja za uskladištenje i pretakanje goriva motornih vozila;
- aa) svih vrsta stambenih i poslovnih objekata površine preko 1000m² i objekata koji imaju četiri i više nadzemnih etaža, industrijskih i infrastrukturnih objekata u zonama loža od 8° i više seizmičnosti po MCS skali (Mercalli-Cancani-Siebergova skala), kao i za sve vrste trajnih objekata na uslovno stabilnim terenima po opšte važećim inženjersko - geološkim kriterijima;
- bb) sistema za meliorizaciju;
- cc) za prostorno i za urbanističko planiranje, a za nivoe za koje su potrebne podloge razmjere 1:10.000,1:5.000,1:1.000 itd.

Član 8.
(Eksploataciona geološka istraživanja)

(1) Eksploaciona geološka istraživanja obuhvataju geološko-rudarske istražne radove za potrebe racionalne eksploatacije mineralne sirovine, zaštitu i obezbjeđenje radne sredine, zaposlenika, opreme i objekata u eksploacionom prostoru.

(2) Istražni radovi iz stava (1) ovog člana izvode se s ciljem:

- a) praćenja sastava i provjere kvaliteta mineralne sirovine projektovane za eksploataciju;
- b) doistraživanja novih količina mineralne sirovine i prekategorizacije iz nižih u višu kategoriju u cilju obnavljanja rezervi A+B kategorije u ležištu;
- c) praćenja kontinuiteta rasprostiranja mineralne sirovine u geološkoj sredini, uz evidentiranje svih tektonskih struktura;
- d) snimanja i prikupljanja podataka o hidrogeološkim uslovima radi poduzimanja zaštitnih mjera od prodora podzemnih voda u jamske prostorije ili odvodnjavanje površinskih kopova i
- e) permanentnog snimanja i praćenja stanja geološke sredine sa napredovanjem rudarskih radova u jamskim i površinskim rudarskim objektima u cilju zaštite radne sredine i nesmetanog odvijanja eksploatacije u ležištu.

(3) Privredno društvo-investitor koji vrši eksploataciju mineralne sirovine obavezan je izvoditi istraživanja iz stava (1) i (2) ovog člana i na osnovu navedenih istražnih radova izrađivati geološke planove i detaljne geološke karte eksploacionog polja.

Član 9.

(Geološka istraživanja od interesa za Kanton)

(1) Geološka istraživanja od interesa za Kanton su:

- a) regionalna, detaljna i eksploaciona geološka istraživanja tla, stijena i mineralnih sirovina koje Vlada Hercegovačko-neretvanskog kantona odlukom proglašuje od interesa za Kanton;
- b) izrada geološke dokumentacije, utvrđene odlukom Vlade Kantona;
- c) geološka istraživanja radi zaštite životne sredine.

(2) Odluku o istraživanju iz stava (1) ovog člana donosi Vlada Kantona na prijedlog kantonalnog ministarstva nadležnog za rudarstvo i geologiju (u daljem tekstu: Ministarstvo).

(3) Postupak dodjele odobrenja za istraživanje iz stava (2) ovog člana vrši se u skladu sa Zakonom o javnim nabavkama Bosne i Hercegovine („Službeni glasnik BiH“, broj: 49/04, 19/05, 52/05, 92/05, 8/06, 24/06, 70/06 i 12/09).

(4) Način i uslovi dodjele odobrenja za geološka istraživanja iz stava (1) ovog člana propisat će se pravilnikom koji donosi ministar kantonalnog ministarstva nadležnog za rudarstvo i geologiju (u daljem tekstu: Kantonalni ministar).

Član 10.

(Sredstva i kriteriji za finansiranje geoloških istraživanja od interesa za Kanton)

(1) Sredstva za finansiranje geoloških istraživanja od interesa za Kanton iz člana 9. ovog Zakona obezbjeđuju se u Budžetu Kantona.

(2) Sredstva za geološka istraživanja koriste se na osnovu kriterija za finansiranje geoloških istraživanja od interesa za Kanton, koje će propisati Kantonalni ministar.

(3) Privredna društva, javne ustanove i specijalizirane institucije za geološka istraživanja konkurišu za budžetska sredstva za istraživanja, prema kriterijima za finansiranje geoloških istraživanja od interesa za Kanton iz stava (1) ovog člana, u skladu sa Zakonom o javnim nabavkama.

POGLAVLJE III - ISTRAŽNI PROSTOR

Član 11. (Istražni prostor)

(1) Istražni prostor definisan u programu ili projektu geoloških istraživanja ograničen je koordinatama prelomnih tačaka na topografskoj osnovi u mjerilu do 1:10.000.

(2) Odobrenje za istraživanje na određenom istražnom prostoru dodjeljuje se privrednom društvu - investitoru u skladu sa ovim Zakonom.

(3) Geološka istraživanja mineralne sirovine dopuštena su samo unutar odobrenog istražnog prostora.

Član 12. (Prostor gdje nisu dozvoljena geološka istraživanja)

Geološka istraživanja u cilju eksploatacije mineralne sirovine nisu dozvoljena na prostoru gdje se nalaze vodoprivredni objekti i uređaji za vodosnadbijevanje, objekti i prostori značajni za odbranu, spomenici kulture, prirodne rijetkosti, groblja i prostori zaštićeni u skladu sa drugim zakonima.

POGLAVLJE IV - VOĐENJE KATASTRA

Član 13. (Katastar odobrenih istražnih prostora i geoloških pojava)

(1) Ministarstvo vodi evidenciju i katastar odobrenih istražnih prostora za odobrenja izdata na području Kantona.

(2) Ministarstvo je obavezno po donošenju rješenja dostavljati nadležnom federalnom ministarstvu rješenje o odobrenom istražnom prostoru iz stava (1) ovog člana, radi uvođenja u katastar istražnih prostora za područje cijele Federacije.

(3) Način vođenja evidencije i katastra odobrenih istražnih prostora, ležišta mineralne sirovine i katastra geoloških pojava na području Kantona propisuje se pravilnikom koji donosi Kantonalni ministar.

POGLAVLJE V - IZRADA I REVIZIJA GEOLOŠKE DOKUMENTACIJE

Član 14.
(Tehnička dokumentacija za izvođenje geoloških istraživanja)

- (1) Regionalna geološka istraživanja vrše se na osnovu programa za istraživanje i ispitivanje urađenog od strane privrednog društva ili javne ustanove koja ispunjava uslove propisane važećim propisima iz oblasti geologije na području Federacije.
- (2) Detaljna i eksploataciona geološka istraživanja izvode se na osnovu projekta za istraživanje i ispitivanje urađenog od strane privrednog društva ili javne ustanove koja ispunjava uslove propisane važećim propisima iz oblasti geologije na području Federacije.
- (3) Program i projekat geoloških istraživanja izrađivat će se prema važećim propisima iz oblasti geologije na području Federacije.

Član 15.
(Dokumentacija za geološka istraživanja potrebna za građenje stambenih i drugih objekata)

- (1) Detaljna geološka istraživanja tla za građenje stambenih i drugih građevinskih objekata za čiju su izgradnju propisana obavezna geološka istraživanja tla vrše se na osnovu projekta istraživanja čiji se rezultati prezentuju u elaboratu o izvedenim istražnim radovima.
- (2) Za individualne i samostojeće objekte i standardna geomehnička ispitivanja nije neophodna prethodna izrada projekta istraživanja.
- (3) Obavljanje istraživanja iz stava (1) ovog člana vrši se prije izdavanja odobrenja za građenje tih objekata u skladu sa propisima kojima se uređuje oblast prostornog uređenja i građenja, a sve u skladu sa ovim Zakonom.

Član 16.
(Stručna lica koja se mogu baviti izradom i revizijom geološke dokumentacije i rukovođenjem istražnim geološkim radovima)

- (1) Izradom programa i projekata za regionalna geološka istraživanja, revizijom i rukovođenjem tim istražnim radovima mogu se baviti diplomirani inženjeri geologije sa položenim stručnim ispitom i radnim iskustvom u struci od najmanje pet godina.
- (2) Izradom projekata detaljnih geoloških istraživanja, elaborata o klasifikaciji, kategorizaciji i proračunu rezervi mineralne sirovine, revizijom projektne i druge tehničke dokumentacije, te rukovođenjem istražnim radovima mogu se baviti diplomirani inženjeri geologije sa položenim stručnim ispitom i radnim iskustvom u struci od najmanje tri godine.
- (3) Izradom i revizijom projektne, tehničke i druge dokumentacije za eksploataciona geološka istraživanja i rukovođenjem istražnim radovima mogu se baviti diplomirani inženjeri geologije sa položenim stručnim ispitom i radnim iskustvom od tri godine.
- (4) Pri izradi projektne, tehničke i druge dokumentacije za geološka istraživanja, poslove specijalističkih ispitivanja koja su predviđena projektnom dokumentacijom (minerološka, geomehnička, geofizička i dr.) mogu obavljati i stručna lica građevinske, rudarske, hemijske, tehnološke i druge struke u skladu sa ovim Zakonom.

Član 17. **(Revizija geološke dokumentacije)**

(1) Programi i projekti geoloških istraživanja obavezno podliježu reviziji u pogledu kvaliteta, opravdanosti izvođenja istražnih radova, mjera i normativa zaštite na radu pri izvođenju geoloških istraživanja, uticaja i zaštite okoline, uticaja projektovanih istražnih radova na sigurnost podzemnih i površinskih objekata i ljudi, kao i u pogledu primjene savremenih metoda i dostignuća geološke nauke i usaglašenosti sa tehničkim propisima, normativima i standardima.

(2) Reviziju programa, projekata, izvještaja i elaborata o geološkim istraživanjima može vršiti samo privredno društvo ili javna ustanova koja je registrovana za izradu geološke dokumentacije u skladu sa važećim propisima iz oblasti geologije na području Federacije, a koje nije učestvovalo u izradi programa, projekta i izvještaja o geološkim istraživanjima.

(3) Privredno društvo ili javna institucija koja vrši reviziju programa, projekta i elaborata, kao i stručno lice koje je vršilo reviziju preuzima odgovornost u pogledu izvršene revizije.

(4) Sadržaj i način izrade programa i projekta za istraživanja i izvještaja i elaborata o izvršenim geološkim istraživanjima, te uslovi i postupak vršenja revizije vrše se prema važećim propisima iz oblasti geologije na području Federacije.

(5) Izvještaji i elaborati o izvršenim geološkim istraživanjima podliježu obaveznoj reviziji u cilju pregleda kvaliteta i pouzdanosti podataka i rezultata istraživanja.

(6) Reviziju izvještaja i elaborata vrši privredno društvo ili javna ustanova koja je registrovana za izradu geološke dokumentacije.

(7) Reviziju izvještaja i elaborata o izvršenim geološkim istraživanjima od interesa za Kanton vrši stručna komisija koju imenuje Kantonalni ministar. U stručnu komisiju imenuju se stručna lica geološke struke koja ispunjavaju uslove propisane članom 16. stav (1), (2) i (3) ovog Zakona. Za člana stručne komisije imenuje se i stručno lice geološke ili rudarske struke iz Ministarstva.

(8) Stručnoj komisiji pripada naknada za rad. Imenovanje, rad i naknada za rad stručne komisije iz stava (7) ovog člana i člana 36. ovog Zakona propisuje se pravilnikom koji donosi Kantonalni ministar.

POGLAVLJE VI - POSTUPAK ODOBRAVANJA GEOLOŠKIH ISTRAŽIVANJA

Član 18. **(Uslovi za izvođenje geoloških istraživanja)**

(1) Privredno društvo - investitor može obezbijediti izvođenje geoloških istraživanja u smislu ovog Zakona samo na osnovu pribavljenog odobrenja za izvođenje geoloških istraživanja od nadležnog organa iz člana 19. ovog Zakona.

(2) Izradu geološke dokumentacije i izvođenje istražnih geoloških radova može vršiti samo privredno društvo ili javna ustanova koja ispunjava uslove propisane važećim propisom na području Federacije koji reguliše ovu oblast.

Član 19. **(Nadležnosti za izdavanje odobrenja za izvođenje geoloških istraživanja)**

- (1) Geološka istraživanja vrše se na osnovu odobrenja nadležnog organa uprave.
- (2) O zahtjevu za odobrenje za izvođenje regionalnih i detaljnih geoloških istraživanja za mineralne sirovine iz člana 3. ovog Zakona rješava Ministarstvo.

Član 20.

(Zahtjev za odobrenje za izvođenje regionalnih i detaljnih geoloških istraživanja)

- (1) Zahtjev za odobrenje za izvođenje regionalnih i detaljnih geoloških istraživanja sadrži:
- a) naziv podnosioca zahtjeva;
 - b) predmet istraživanja (vrsta mineralne sirovine);
 - c) vrstu i obim istražnih radova;
 - d) prostor za istraživanje (opis veličine prostora, površina, oblik, morfologija i dr.)
 - e) vrijeme početka i završetka istraživanja.
- (2) Uz zahtjev iz stava (1) ovog člana privredno društvo - investitor je dužan priložiti:
- a) topografsku osnovu (situacioni plan – kartu sa ucrtanim granicama istražnog prostora, određenog koordinatama prelomnih tačaka, u mjerilu koje omogućava da se na njegovoj podlozi u prirodi mogu odrediti granice prostora za istraživanje, sa opisom položaja istražnog prostora i naznakom općine gdje se prostor nalazi);
 - b) kopiju katastarskog plana, zemljišnoknjižne izvratke i posjedovne listove za sve parcele unutar istražnog prostora;
 - c) urbanističku saglasnost za istraživanje definisanu programom ili projektom istraživanja, izdatu od strane nadležnog ministarstva za prostorno uređenje;
 - d) program regionalnih istraživanja ili projekat detaljnih geoloških istraživanja određene mineralne sirovine i detaljnih geoloških istraživanja u druge namjene;
 - e) izvještaj o izvršenoj reviziji programa odnosno projekta istraživanja;
 - f) dokaz o registraciji privrednog društva - investitora sa šiframa djelatnosti koje se odnose na eksploataciju mineralne sirovine za koju se zahtjev podnosi;
 - g) dokaze o upisu u registar društava i odobrenje nadležnog organa za bavljenje registrovanom djelatnošću za privredno društvo ili javnu ustanovu koja je izradila i revidirala projekat geoloških istraživanja;
 - h) saglasnost za obavljanje istražnih radova od vlasnika zemljišta na kojem će se vršiti istraživanje.

Član 21.

(Odobrenje za izvođenje geoloških istraživanja)

- (1) Odobrenje za izvođenje geoloških istraživanja iz člana 18. stav (1) ovog Zakona je upravni akt koji sadrži:
- a) predmet istraživanja;
 - b) naziv privrednog društva - investitora kome je odobreno istraživanje mineralne sirovine;

- c) naziv istražnog prostora definisan koordinatama prelomnih tačaka i katastarske čestice prostora na kome će se izvršiti projektovani obim i vrsta istražnih radova;
- d) veličinu istražnog prostora;
- e) najmanji obim i vrstu istražnih radova koji se moraju izvršiti;
- f) najveću količinu mineralne sirovine koja se može izvaditi u cilju ispitivanja kvaliteta i hemijsko-tehnoloških osobina;
- g) uslove i ograničenja kojih se mora pridržavati privredno društvo kojem je odobreno istraživanje pri izvođenju istražnih radova;
- h) rok do kojeg se mora početi sa istraživanjem;
- i) rok za podnošenje izvještaja o provedenom istraživanju;
- j) obaveza dovođenja zemljišta u prvobitno stanje nakon istraživanja.

(2) Vremenski period izvođenja odobrenih geoloških istraživanja određuje se u skladu sa dinamikom koja je predviđena programom ili projektom geoloških istraživanja.

(3) Važenje odobrenja za geološka istraživanja može se, na zahtjev privrednog društva - investitora, produžiti za još jedan period naznačen u odobrenju, ako se nisu promijenili uslovi u skladu sa kojim je izdato odobrenje za istraživanje i ukoliko je izvedeno više od 50 % projektovanih istražnih radova.

Član 22.

(Vođenje postupka za izdavanje odobrenja za izvođenje geoloških istraživanja)

(1) Ministarstvo je dužno u postupku izdavanja odobrenja za izvođenje geoloških istraživanja utvrditi da li je program ili projekat geoloških istraživanja izrađen u skladu sa važećim pravilnikom o sadržini programa i projekta geoloških istraživanja i u skladu sa ovim Zakonom.

(2) U postupku izdavanja odobrenja za izvođenje geoloških istraživanja iz člana 19. stav (2) Ministarstvo zakazuje usmenu raspravu pozivom u kojem se navodi mogućnost uvida pozvanim licima u podnesenu projektnu dokumentaciju.

(3) Na usmenu raspravu se pozivaju pravno lice na čiji zahtjev se vodi postupak izdavanja odobrenja, privredno društvo koje vrši istraživanje ili eksploataciju, a čije istražno ili eksploatacijsko polje neposredno graniči sa istražnim poljem za koje se vodi postupak odobrenja, jedinica lokalne samouprave kojoj teritorijalno pripada istražni prostor.

(4) Poziv na usmenu raspravu dostavlja se licima koja se pozivaju i na oglasnu tablu jedinice lokalne samouprave kojoj teritorijalno pripada istražni prostor, najmanje osam dana od roka održavanja usmene rasprave koji je naveden u pozivu.

(5) Ministarstvo je dužno u roku od petnaest dana od dana podnošenja zahtjeva podnosioca pisano pozvati na ispravku podneska ako ne ispunjava propisane uslove za izdavanje odobrenja za izvođenje geoloških istraživanja, odnosno obavijestiti ga o potrebi dopune zahtjeva sa traženim dokumentima.

(6) Podnosilac zahtjeva dužan je upotpuniti zahtjev u ostavljenom roku, a najkasnije u roku od petnaest dana od dana prijema pisanog obavještenja.

(7) U postupku izdavanja odobrenja za izvođenje geoloških istraživanja primjenjuju se propisi o upravnom postupku, ukoliko odredbama ovog Zakona nije drugačije utvrđeno.

Član 23. (Odbijanje zahtjeva za geološka istraživanja)

(1) Zahtjev za izdavanje odobrenja za izvođenje geoloških istraživanja odbiti će se rješenjem:

- a) ako podnosilac zahtjeva u roku od petnaest dana od zatražene dopune ne upotpuni zahtjev iz člana 22. stav (5) ovog Zakona;
- b) ako privredno društvo - investitor nije registrovan kod nadležnog suda i ne ispunjava propisane uslove za izdavanje odobrenja za izvođenje geoloških istraživanja;
- c) ako se u postupku izdavanja odobrenja utvrdi da bi se istražnim radovima ugrozila sigurnost i zdravlje ljudi i imovine ili ako bi se istražnim radovima ometalo obavljanje drugih djelatnosti;
- d) ako je drugom privrednom društvu već izdato odobrenje na istom istražnom prostoru za istu vrstu mineralne sirovine;
- e) ako se izvršenom revizijom programa ili projekta zaključi da nije opravdano vršiti istraživanje.

Član 24. (Ukidanje odobrenja za izvođenje geoloških istraživanja)

(1) Privrednom društvu – investitoru odobrenje za izvođenje geoloških istraživanja ukida se:

- a) ako i pored naloga nadležnog inspektora nisu provedene mjere zaštite okoliša, zaštite na radu, potrebne mjere za sigurnost ljudi i imovine i ne sprovode propisani urbanistički, vodoprivredni i ekološki uslovi;
- b) ako se istražnim radovima ometaju ili ugrožavaju drugi radovi na istom ili susjednom prostoru;
- c) ako se istraživanje izvodi neracionalno i time ugrožava buduća eksploatacija mineralne sirovine na tom ili drugom istražnom prostoru;
- d) ako se blagovremeno ne nadoknađuje šteta na privatnom posjedu prouzročena u toku istraživanja;
- e) ako se pod vidom istraživanja vrši eksploatacija mineralne sirovine i
- f) ako se istraživanje ne obavlja u skladu sa odobrenim programom ili projektom geoloških istraživanja i uslovima utvrđenim u izdatom odobrenju za istraživanje.

(2) U slučajevima iz stava (1) ovog člana, privredno društvo nema pravo na naknadu sredstava uložениh u istraživanje.

Član 25.

(Odobrenje za geološka istraživanja za proširenje eksploatacionog polja)

(1) Za izvođenje geoloških istraživanja za mineralnu sirovinu na već odobrenom istražnom prostoru u cilju proširenja eksploatacionog polja i prevođenja rezervi iz jedne u drugu kategoriju, privredno društvo - investitor koji je korisnik istražnog prostora podnosi zahtjev Ministarstvu u skladu sa članom 20. ovog Zakona.

(2) Ministarstvo izdaje rješenje sa ograničenim prostorom za istraživanje u skladu sa članovima 21., 22. i 23. ovog Zakona, u cilju osiguranja novoistraženih rezervi odgovarajuće kategorije i klase za tekuću proizvodnju.

Član 26.

(Odobrenje za istraživanje različitih mineralnih sirovina)

Na isti istražni prostor može se izdati više odobrenja za istraživanje, ako se odnose na različite vrste istraživanja ili različite mineralne sirovine i ako se istražni radovi mogu nesmetano odvijati.

POGLAVLJE VII - VRŠENJE GEOLOŠKIH ISTRAŽIVANJA

Član 27.

(Prijava početka izvođenja istražnih radova)

Privredno društvo ili javna ustanova koje obavlja geološka istraživanja ili investitor tih radova, dužno je prijaviti početak istražnih radova Ministarstvu najkasnije 15 dana prije početka istraživanja.

Član 28.

(Izvođenje istražnih radova i izrada elaborata o klasifikaciji, kategorizaciji i proračunu rezervi mineralne sirovine)

(1) Privredno društvo - investitor dužno je osigurati izvođenje istražnih radova i izradu elaborata o klasifikaciji, kategorizaciji i proračunu rezervi mineralne sirovine u skladu sa programom odnosno projektom istraživanja.

(2) Elaborat o klasifikaciji, kategorizaciji i proračunu rezervi mineralne sirovine izradit će se prema važećim propisima na području Federacije.

Član 29.

(Primjena propisa pri izvođenju geoloških istraživanja)

Privredno društvo ili javna ustanova koje vrši geološka istraživanja mineralne sirovine dužno je izvoditi radove prema odobrenom programu odnosno projektu geoloških istraživanja, ovom Zakonu, tehničkim propisima, normativima i standardima koji važe za izvođenje tih radova, provoditi propisane mjere zaštite na radu, blagovremeno preduzimati mjere za zaštitu građana i imovine, preduzimati propisane mjere zaštite okoliša i istražne radove izvoditi prema urbanističkim, vodoprivrednim, građevinskim i okolišnim uslovima.

Član 30.
(Evidencije u toku izvođenja geoloških istraživanja)

- (1) Pri izvođenju istražnih radova može se vaditi mineralna sirovina u količinama koje zahtijevaju istražni radovi i tehnološka ispitivanja a koja je određena u odobrenju za geološka istraživanja iz člana 21. ovog Zakona.
- (2) Privredno društvo - investitor u toku izvođenja istraživanja dužno je voditi evidenciju o izvađenim količinama mineralnih sirovina, o mjestu deponovanja korištenju u druge namjene.
- (3) Privredno društvo ili javna ustanova dužna je utvrditi i voditi evidenciju o utvrđenim osnovnim obilježjima drugih mineralnih sirovina koje su otkrivene tokom istraživanja na odobrenom istražnom prostoru, kao i o posebnim karakteristikama istražnog prostora (klizišta, vode, gasovi, kora raspadanja i sadržaj korisnih mineralnih sirovina).
- (4) Privredno društvo ili javna ustanova dužna je da, ukoliko pri izvođenju istražnih radova naiđe na karakteristične fosile, minerale, rude i stijene o tome obavijesti instituciju nadležnu za njihovo prikupljanje i čuvanje.
- (5) Vađenje mineralnih sirovina u toku istraživanja mora se izvoditi prema odgovarajućim propisima koji se primjenjuju u oblasti rudarstva.

Član 31.
(Geološka istraživanja u odobrenom eksploatacionom polju)

- (1) Privredno društvo - investitor koji se bavi eksploatacijom mineralne sirovine dužan je da putem geološke službe, u okviru svog eksploatacionog polja prati eksploataciju i na osnovu projekata istraživanja izvodi detaljna i eksploataciona geološka istraživanja u cilju sveobuhvatnog izučavanja geoloških svojstava ležišta, pre Kategorizaciju rezervi i praćenje kvaliteta mineralne sirovine.
- (2) Privredno društvo - investitor dužan je na osnovu plana geoloških istraživanja izraditi projekat geoloških istraživanja i elaborat o rezervama i kvalitetu mineralne sirovine u okviru eksploatacionog polja.
- (3) Obaveza privrednog društva - investitora koji vrši eksploataciju mineralne sirovine je da osniva i vodi knjigu evidencije rezervi mineralne sirovine i svake godine do 15. marta tekuće godine za prethodnu godinu dostavlja Ministarstvu izvještaj o stanju i kvalitetu mineralne sirovine.
- (4) Privredno društvo- investitor koji se bavi eksploatacijom mineralne sirovine, ukoliko nema svoju geološku službu dužno je da poslove geološke djelatnosti povjeri privrednom društvu ili javnoj ustanovi ili stručnom licu koje ispunjava uslove za obavljanje tih poslova za period dok traje eksploatacija.
- (5) Za istraživanje odobrene mineralne sirovine u okviru eksploatacionog polja nije potrebno odobrenje Ministarstva. Eksploataciona geološka istraživanja u odobrenom eksploatacionom polju privredna društva izvode u skladu sa godišnjim planom istraživanja i na osnovu revidovanog projekta istraživanja kojeg odobrava rukovodilac privrednog društva.

Član 32.
(Geološka istraživanja neodobrene mineralne sirovine u odobrenom eksploatacionom polju)

Za istraživanje novootkrivene mineralne sirovine u odobrenom eksploatacionom polju, čija eksploatacija nije odobrena, privredno društvo - investitor koji vrši eksploataciju dužan je pribaviti odobrenje od Ministarstva, ili to odobrenje može pribaviti i drugo privredno društvo uz saglasnost privrednog društva – investitora koji vrši eksploataciju u odobrenom eksploatacionom polju.

Član 33.
(Ustupanje rezultata izvedenih geoloških istraživanja ležišta mineralne sirovine)

Privredno društvo - investitor koji je ulaganjem vlastitih sredstava obavio istraživanje jednog ili više ležišta mineralne sirovine, može rezultate istraživanja, uz naknadu utvrđenu ugovorom, ustupiti drugom privrednom društvu - investitoru uz prethodno pribavljeno odobrenje Ministarstva.

POGLAVLJE VIII - IZVJEŠTAJI O GEOLOŠKIM ISTRAŽIVANJIMA I DOSTAVA PODATAKA FEDERALNOM ZAVODU ZA GEOLOGIJU

Član 34.
(Elaborat i izvještaj o provedenim geološkim istraživanjima)

(1) Privredno društvo - investitor dužno je Ministarstvu u toku istraživanja u rokovima utvrđenim u odobrenju za istraživanje podnositi periodične izvještaje o izvršenim istražnim radovima, rezultatima istraživanja mineralne sirovine i drugim podacima o kojima vodi evidenciju prema članu 30. ovog Zakona i o planiranim istraživanjima u druge namjene.

(2) Privredno društvo - investitor dužno je Ministarstvu podnositi godišnji izvještaj o rezultatima istraživanja do 15. marta tekuće za proteklu godinu.

(3) Nakon završetka ili trajnog obustavljanja istraživanja, privredno društvo - investitor dužno je Ministarstvu podnijeti elaborat sa dokumentacijom o obimu izvedenih istražnih radova, eventualnim odstupanjima od projekta istraživanja, rezultatima istraživanja i tehnoloških ispitivanja za period u kojem su izvođeni istražni radovi koji sadrži i podatke iz stava (1) ovog člana i člana 30. ovog Zakona.

(4) Elaborat o završenim istraživanjima tla i stijena za gradnju objekata sadrži posebno podatke o inženjersko-geološkim i hidrogeološkim karakteristikama, te podatke o geomehaničkim i geotehničkim svojstvima tla i stijena.

Član 35.
(Dostava podataka Federalnom zavodu)

Privredna društva - investitori koja vrše istraživanje, finansiraju i organizuju geološka istraživanja, posebno građevinska, rudarska, vodoprivredna, šumarska i poljoprivredna dužna su Federalnom zavodu za geologiju dostavljati podatke o vrsti i obimu istraživačkih radova i visini ulaganja finansijskih sredstava u te radove u skladu sa članom 34. ovog Zakona s ciljem izrade baze podataka o geološkim istraživanjima.

POGLAVLJE IX - IZDAVANJA RJEŠENJA O PRIZNAVANJU REZERVI

MINERALNE SIROVINE

Član 36.

(Izrada elaborata o klasifikaciji, kategorizaciji i proračunu rezervi mineralne sirovine)

- (1) Po završetku detaljnih geoloških istraživanja privredno društvo - investitor dužan je da izradi elaborat o klasifikaciji, kategorizaciji i proračunu rezervi mineralne sirovine sa geološko-ekonomskom ocjenom i domenom primjene mineralne sirovine.
- (2) Ministarstvo donosi rješenje – upravni akt o potvrđenim količinama i kvalitetu mineralne sirovine.
- (3) Rezerve mineralne sirovine razvrstavaju se u klase i kategorije, saglasno važećem pravilniku o klasifikaciji, kategorizaciji i proračunu rezervi čvrstih mineralnih sirovina i podzemnih voda.

Član 37.

(Vođenje postupka za izdavanje rješenja kojim se potvrđuje količina i kvalitet mineralne sirovine)

- (1) Privredno društvo - investitor dužno je 15 dana nakon izrade elaborata podnijeti Ministarstvu zahtjev za reviziju elaborata.
- (2) Elaborat o klasifikaciji, kategorizaciji i proračunu rezervi mineralne sirovine (u daljem tekstu: elaborat) podliježe obaveznoj reviziji od strane stručne komisije koju po zahtjevu imenuje Ministarstvo.
- (3) Po zahtjevu za reviziju elaborata privrednog društva - investitora, Ministarstvo donosi rješenje o imenovanju stručne komisije za reviziju elaborata. U stručnu komisiju imenuju se stručna lica geološke struke koja ispunjavaju uslove propisane članom 16. stav (1), (2) i (3) ovog Zakona. Stručnoj komisiji pripada naknada za rad. Imenovanje, rad i naknada za rad stručne komisije iz ovog člana propisuje se pravilnikom koji donosi Kantonalni ministar.
- (4) Troškove rada stručne komisije za reviziju elaborata snosi privredno društvo - investitor koje je podnijelo zahtjev za reviziju elaborata.
- (5) Ministarstvo organizuje reviziju na koju poziva stručnu komisiju, podnosioca zahtjeva i privredno društvo ili javnu ustanovu koja je nosilac izrade elaborata. U toku revizije Ministarstvo sastavlja zapisnik.
- (6) Nakon prihvatanja elaborata od strane stručne komisije, Ministarstvo izdaje rješenje o potvrđivanju količine i kvaliteta mineralne sirovine na određenom istražnom prostoru.
- (7) Ministarstvo dostavlja primjerak elaborata Federalnom zavodu za geologiju za potrebe fonda stručne dokumentacije.
- (8) Jedan primjerak rješenja o potvrđivanju količine i kvaliteta mineralne sirovine Ministarstvo dostavlja federalnom ministarstvu nadležnom za geologiju i rudarstvo radi evidentiranja i prikupljanja podataka o rezervama mineralne sirovine i o bilansu rezervi.

Član 38.

(Rješenje o potvrđivanju količina i kvaliteta mineralne sirovine)

Rješenjem o potvrđivanju količina i kvaliteta mineralnih sirovina određuje se:

- a) naziv privrednog društva - investitora kome je odobreno istraživanje mineralne sirovine;
- b) precizno definisan istražni prostor (naziv, površina, koordinate, katastarske čestice) i vrsta mineralne sirovine;
- c) potvrđena količina bilansnih rezervi mineralne sirovine;
- d) potvrđena količina vanbilansnih rezervi (nije obavezna);
- e) potvrđen kvalitet mineralne sirovine;
 - 1) hemijski sastav mineralne sirovine;
 - 2) fizičko mehaničke osobine mineralne sirovine;
- f) mogućnost primjene;
- g) koordinate istražnog prostora.

Član 39.

(Nadomirivanje eksploatisanih količina mineralne sirovine)

(1) Privredno društvo - investitor koje vrši eksploataciju mineralne sirovine dužno je da eksploatisane količine mineralne sirovine nadomiri novoistraženim rezervama odgovarajuće kategorije i klase za tekuću proizvodnju.

(2) Privredno društvo - investitor iz stava (1) ovog člana, dužno je da izradi i dostavi na reviziju Ministarstvu elaborat o klasifikaciji, kategorizaciji i proračunu rezervi mineralne sirovine u istražnom, odnosno eksploatacijskom polju svake pete godine za ležišta čije rezerve obezbjeđuju tekuću proizvodnju za period od deset godina, a svake sedme godine za ležišta čije rezerve obezbjeđuju proizvodnju za period duži od deset godina.

POGLAVLJE X - POSTUPAK NAKON ZAVRŠETKA ISTRAŽIVANJA

Član 40.

(Zaštita istražnog prostora nakon završetka istraživanja)

Nakon završetka ili trajnog obustavljanja istražnih radova, privredno društvo - investitor dužno je da na istražnom prostoru provede sve mjere zaštite kojima se isključuje mogućnost nastupanja opasnosti za ljude i imovinu, a zemljište oštećeno istraživanjem dužno je da osposobi za korištenje saglasno odobrenju iz člana 21. ovog Zakona.

Član 41.

(Obaveze po završetku ili trajnoj obustavi geoloških istraživanja)

(1) Nakon završetka ili trajnog obustavljanja istražnih radova, privredno društvo - investitor dužno je obavijestiti Ministarstvo o provedenim mjerama sigurnosti i saniranja istražnog prostora.

(2) Ministarstvo je dužno provjeriti da li su provedene mjere dovoljne i da li se njima isključuje mogućnost nastupanja opasnosti za ljude i imovinu.

(3) Ako Ministarstvo utvrdi da su provedene mjere osiguranja dovoljne, obavijestiti će o tome privredno društvo kojem je odobreno istraživanje.

(4) Ako Ministarstvo utvrdi da provedene mjere osiguranja nisu dovoljne, naložiti će

privrednom društvu investitoru da u određenom roku otkloni utvrđene nedostatke, odnosno da provede i druge mjere osiguranja.

(5) Ako privredno društvo - investitor ne postupi prema nalogu iz stava (4) ovog člana, organ koji je izdao nalog provest će potrebne mjere obezbjeđenja o trošku privrednog društva kojem je odobreno istraživanje.

POGLAVLJE XI - NADZOR

Član 42.

(Nadzor nad provođenjem Zakona)

(1) Nadzor nad provođenjem ovog Zakona i propisa donijetih na osnovu ovog Zakona vrši Ministarstvo.

(2) Inspekcijски nadzor vrši kantonalni geološki ili rudarski inspektor.

Član 43.

(Geološki inspektor)

Poslove geološkog inspektora (daljem tekstu: inspektor) može obavljati diplomirani inženjer geologije, odnosno diplomirani inženjer rudarstva, sa radnim iskustvom u struci od najmanje tri godine, i sa položenim stručnim ispitom.

Član 44.

(Nadležnost inspekcije)

U vršenju nadzora inspektor kontrolišе da li:

- a) je privredno društvo - investitor za izvođenje geoloških istraživanja pribavilo odobrenja u skladu sa članom 18. i 22. ovog Zakona i da li se radovi izvode u skladu sa odobrenom projektnom dokumentacijom;
- b) privredno društvo ili javna ustanova koja vrši geološka istraživanja poštuje zakone i tehničke propise, normative i standarde koji se odnose na izvođenje tih radova i provode propisane mjere zaštite građana, imovine i mjere zaštite okoliša iz člana 29. ovog Zakona;
- c) lica koja se bave izradom i revizijom dokumentacije za geološka istraživanja ispunjavaju uslove propisane članom 16. ovog Zakona;
- d) privredno društvo - investitor koji se bavi eksploatacijom redovno dopunjava geološke planove - karte i ostalu dokumentaciju potrebnu za pravilno tehničko i racionalno izvođenje rudarskih radova i vrši ostale propisane radove u skladu sa članom 8., 30., 34. i 39. ovog Zakona;
- e) privredno društvo - investitor vađenje mineralnih sirovina pri istražnim radovima vrši u skladu sa članom 30. ovog Zakona;
- f) privredno društvo - investitor pri izvođenju istražnih radova podnosi izvještaj u skladu sa članom 34. ovog Zakona.

Član 45.

(Prava i dužnosti inspektora)

- (1) Pri vršenju inspekcijskog nadzora inspektor ima pravo:
 - a) nesmetanog vršenja inspekcijskog pregleda i ulaska u prostore gdje se izvode istražni radovi, tražiti podatke, dokumente i izvještaje koji su potrebni pri vršenju inspekcijskog pregleda;
 - b) pregledati tehničku i drugu dokumentaciju;
 - c) utvrđivati identitet lica koja izvode istražne radove;
 - d) privremeno oduzimati tehničku dokumentaciju ili je fotokopirati;
 - e) fotografisati lokacije na kojima je zabranio radove;
 - f) tražiti potrebne podatke ili osnovne uzorke mineralnih sirovina ili drugog materijala;
 - g) tražiti pomoć stručne organizacije ili pojedinih stručnih lica;
 - h) privremeno zabraniti izvođenje geoloških i rudarskih radova.
- (2) Inspektor može u trajanju do osam dana izuzeti dokumentaciju koja je potrebna za utvrđivanje činjeničnog stanja o razmatranom predmetu, ako je mišljenja da su očigledno prekršene odredbe ovoga Zakona, tehničkih propisa i propisa iz oblasti zaštite i zdravlja na radu i drugih propisa donesenih na osnovu ovoga Zakona, ili ako sumnja da je učinjen prekršaj.
- (3) O izuzimanju dokumentacije iz stava (2) ovog člana, inspektor izdaje privrednom društvu - investitoru potvrdu sa popisom izuzete dokumentacije.

Član 46.

(Dužnosti privrednog društva - investitora i privrednog društva ili javne ustanove koja izvodi geološke istražne radove)

- (1) Privredno društvo - investitor i privredno društvo ili javna ustanova koja izvodi geološke istražne radove dužni su omogućiti inspektoru vršenje inspekcijskog nadzora.
- (2) Privredno društvo - investitor i privredno društvo ili javna ustanova koja izvodi geološke istražne radove dužni su omogućiti uvid u svu dokumentaciju društva, a na traženje inspektora odrediti jedno ili više lica koja će učestvovati u utvrđivanju činjeničnog stanja pri obavljanju inspekcijskog pregleda.

Član 47.

(Zapisnik o inspekcijskom pregledu)

- (1) O obavljenom inspekcijskom pregledu inspektor je obavezan sastaviti zapisnik.
- (2) Utvrđene nedostatke i nepravilnosti o inspekcijskim pregledom inspektor je dužan konstatovati zapisnikom o izvršenom inspekcijskom pregledu.
- (3) Zapisnik sastavlja inspektor koji je izvršio inspekcijski pregled. Ako je inspekcijski pregled obavilo istovremeno više inspektora po istom nalogu (kolektivni inspekcijski pregled) u tom slučaju zajednički sastavljaju jedan zapisnik.
- (4) Zapisnik sadrži, osim navoda propisanih u Zakonu o upravnom postupku i navode koje je neophodno navesti u obavljanju inspekcijskog pregleda.
- (5) Zapisnik o inspekcijskom pregledu je javna isprava osim onih dijelova zapisnika u kojima je subjekt nadzora stavio primjedbu da nije pravilno sastavljen.

Član 48.
(Upravne mjere koje se nalažu rješenjem)

Ukoliko inspektor utvrdi da privredno društvo - investitor, odnosno privredno društvo ili javna ustanova, ne postupa ili nepotpuno postupa prema obavezama koje su mu određene propisima, dužan je prema utvrđenom činjeničnom stanju u zapisniku o obavljenom inspekcijskom pregledu naložiti odgovarajuće upravne mjere i to:

- a) narediti da se utvrđeni nedostaci i nepravilnosti otklone na način i u roku kako je određeno ovim Zakonom i propisima koji su doneseni na osnovu njega;
- b) narediti privremenu zabranu izvođenja radova;
- c) narediti zabranu izvođenja radova;
- d) narediti preduzimanje odgovarajućih upravnih radnji koje je privredni subjekt i drugo pravno lice, institucija koja ima javna ovlaštenja, odnosno organ uprave obavezan da preduzme;
- e) prisilno provesti izvršenje određene upravne mjere kad je privredno društvo - investitor odnosno privredno društvo ili javna ustanova sam ne izvrši;
- f) izdati prekršajni nalog za učinjeni prekršaj;
- g) podnijeti prijavu protiv privrednog društva - investitora odnosno privrednog društva ili javne ustanove i odgovornog lica za učinjeni prekršaj ili krivično djelo;
- h) odrediti i druge mjere i obaviti radnje koje su određene ovim Zakonom i posebnim propisima;
- i) zabraniti obavljanje djelatnosti.

Član 49.
(Privremena zabrana izvođenja geoloških istražnih radova)

Inspektor može rješenjem privremeno zabraniti privrednom društvu - investitoru izvođenje radova do otklanjanja nedostataka, ako prilikom inspekcijskog pregleda utvrdi:

- a) da privredno društvo ili javna ustanova koje izvodi geološka istraživanja nije osiguralo potpunu ispravnost sredstava za rad, radnog prostora i radnog procesa, kako je to određeno odobrenim projektom i tehničkom dokumentacijom po odredbama ovog Zakona;
- b) da privredno društvo ili javna ustanova koja izvodi geološke istražne radove ne primjenjuje u cijelosti odredbe ovog Zakona, tehničke propise, propise iz oblasti zaštite na radu i zaštite zdravlja radnika i druge propise i akte, odnosno ako se radovi ne izvode u skladu sa odobrenom tehničkom dokumentacijom;
- c) da pri korištenju sredstava rada, primjeni radnih postupaka, korištenju radnog prostora koji nije zaštićen, prijeto opasnost od povreda, ugrožavanja zdravlja zaposlenika privrednog društva ili javne ustanove koja izvodi geološke istražne radove i ako se zaposlenici ne pridržavaju odgovarajućih uputa za rad;
- d) da privredno društvo - investitor odnosno privredno društvo ili javna ustanova

- nisu postupili u skladu sa usmeno izrečenim naređenjem inspektora i
- e) da privredno društvo - investitor odnosno privredno društvo ili javna ustanova onemogućava obavljanje inspekcijskog pregleda.

Član 50. (Zabrana izvođenja geoloških istražnih radova)

Inspektor mora rješenjem zabraniti izvođenje istražnih radova ako prilikom inspekcijskog pregleda utvrdi:

- a) da privredno društvo ili javna ustanova koja vrši istraživanje izvodi istražne radove bez odobrenja za istraživanje ili bez odobrenja za obavljanje registrovane djelatnosti ili da se pri izvođenju istražnih radova ne primjenjuju odredbe ovog Zakona, tehnički propisi, propisi iz oblasti zaštite na radu i zdravlja zaposlenika što može ugroziti živote i zdravlje zaposlenika, sigurnost saobraćaja i susjednih objekata, zaštita životne sredine i mogućnost nastanka veće materijalne štete, odnosno ako se radovi ne izvode u skladu sa odobrenom tehničkom dokumentacijom;
- b) da su kod privrednog društva - investitora odnosno privrednog društva ili javne ustanove zaposlena lica koja ne ispunjavaju uslove o stručnoj osposobljenosti po odredbama ovog Zakona;
- c) da privredno društvo - investitor odnosno privredno društvo ili javna ustanova ili njihovo odgovorno lice i pored usmenog naređenja inspektora, ponovno krši odredbe tehničkih propisa, propisa iz oblasti zaštite na radu i zaštite zdravlja radnika i drugih propisa, koji se odnose na rudarske radove, te opštih akata ovog Zakona;
- d) da privredno društvo - investitor odnosno privredno društvo ili javna ustanova pri istraživanju koristi postrojenja i geološku opremu za koju nemaju upotrebnu dozvolu, što neposredno ugrožava sigurnost objekata i uređaja, živote i zdravlje ljudi, odvijanje saobraćaja, susjedne objekte i okoliš i predstavlja neposrednu opasnost za život i zdravlje zaposlenika i
- e) da privredno društvo - investitor odnosno privredno društvo ili javna ustanova pri izvođenju radova zahvata i područje van prostora određenog odobrenjem za istraživanje propisano u skladu sa ovim Zakonom.

Član 51. (Zabrana obavljanja djelatnosti)

(1) Inspektor mora rješenjem zabraniti obavljanje djelatnosti privrednom društvu - investitoru, odnosno privrednom društvu ili javnoj ustanovi ako prilikom inspekcijskog pregleda utvrdi:

- a) da za obavljanje djelatnosti ne ispunjava uslove propisane ovim i drugim Zakonom;
- b) da se pri obavljanju djelatnosti ne primjenjuju propisi i standardi i
- c) ako izradu i reviziju tehničke dokumentacije obavljaju lica koja ne ispunjavaju uslove prema ovom Zakonu.

(2) Trećim licima (pravnim i fizičkim) inspektor će utvrditi upravnu mjeru ukoliko obavljaju djelatnost u suprotnosti sa odredbama ovog Zakona.

Član 52.
(Usmeno određivanje upravne mjere)

- (1) U inspekcijskom pregledu inspektor će privrednom društvu - investitoru, odnosno privrednom društvu ili javnoj ustanovi usmeno odrediti upravnu mjeru i narediti da se odmah izvrši kad je u nastaloj situaciji neophodno, prema ocjeni inspektora, preduzeti radnje na otklanjanju neposredne opasnosti po život i zdravlje ljudi, za saobraćaj, susjedne objekte ili okolinu ili nastanak veće materijalne štete.
- (2) Sadržaj usmene upravne mjere inspektor upisuje u knjigu rudarskog nadzora i u zapisnik o inspekcijskom nadzoru.

Član 53.
(Rok za donošenje rješenja)

- (1) Upravnu mjeru inspektor određuje rješenjem.
- (2) Rješenje o određenim upravnim mjerama inspektor je dužan donijeti u roku petnaest dana, a rješenje u pisanom obliku o usmeno određenoj upravnoj mjeri u roku od tri dana od dana izricanja upravne mjere.

Član 54.
(Izvršenje rješenja)

- (1) Izvršenje rješenja prati inspektor i utvrđuje po službenoj dužnosti.
- (2) Izvršenje rješenja inspektor utvrđuje kontrolnim pregledom ili drugim pisanim dokazom.
- (3) Izvršenje rješenja inspektor može produžiti do 30 dana osim rješenja kojim su upravne mjere usmeno utvrđene.

Član 55.
(Žalba na rješenje)

- (1) Žalba na rješenje iz člana 18. stav (1), 24., 25., 32. i 37. stav (6) može se izjaviti u roku od petnaest dana od dana prijema rješenja.
- (2) Žalba iz stava (1) ovog člana izjavljuje se Vladi Hercegovačko – neretvanskog kantona odnosno organu kojeg ona ovlasti.
- (3) Žalba na rješenje inspektora o naloženim upravnim mjerama iz člana 48., 49., 50. i 51. može se izjaviti u roku od osam dana od dana prijema rješenja.
- (4) O žalbi iz stava (4) ovog člana rješava Ministarstvo.
- (5) Žalba na rješenje inspektora o naloženim upravnim mjerama ne odgađa izvršenje rješenja.
- (6) Protiv rješenja inspektora o usmeno određenoj upravnoj mjeri i rješenja Ministarstva donesenog po žalbi iz stava (4) ovog člana može se pokrenuti upravni spor.

Član 56.
(Rok za rješavanje žalbe)

Žalbu na rješenje inspektora o utvrđenoj upravnoj mjeri nadležni drugostepeni organ dužan je riješiti u roku od petnaest dana od dana prijema žalbe.

POGLAVLJE XII - KAZNE ODREDBE

Član 57. (Prekršaji privrednog društva – investitora)

(1) Novčanom kaznom od 10.000 KM do 15.000 KM kaznit će se za prekršaj pravno lice u svojstvu investitora:

- a) ako vrši geološka istraživanja bez prethodno pribavljenog odobrenja za istraživanje od Ministarstva (član 18., član 25. i član 26.);
- b) ako pri istražnim radovima izvadi veću količinu mineralne sirovine od odobrene i pod vidom istraživanja vrši eksploataciju mineralne sirovine (član 30. stav (1));
- c) ako ne vrši geološka istraživanja u skladu sa odredbama navedenim u odobrenju za geološka istraživanja (član 21.);
- d) ako ne vodi evidenciju o istraživanju mineralne sirovine (član 30. stav (2), (3), (4) i (5));
- e) ako obavlja istraživanje van istražnog prostora (član 11.);
- f) ako prije ulaska u odobreni istražni prostor ne pribavi saglasnost vlasnika zemljišta (član 20. stav (2) tačka g));
- g) ako provodi geološka istraživanja na prostoru na kome geološka istraživanja nisu dozvoljena ili ako istraživanja od posebnog društvenog interesa vrši protivno uslovima i načinu iz odluke nadležnog organa (član 12. i član 9. stav (2));
- h) ako u propisanom roku ne prijavi početak istražnih radova Ministarstvu (član 27.);
- i) ako ne osigura izvođenje istražnih radova i izradu elaborata o klasifikaciji, kategorizaciji i proračunu rezervi mineralne sirovine u skladu sa programom, odnosno projektom istraživanja i pravilnikom o klasifikaciji, kategorizaciji i proračunu rezervi mineralne sirovine (član 28.);
- j) ako u propisanim rokovima ne podnosi periodične izvještaje o izvršenim istražnim radovima i rezultatima istraživanja mineralne sirovine i o planiranim dugoročnim istraživanjima u druge namjene u rokovima utvrđenim u odobrenju za istraživanje (član 34.);
- k) ako se bavi eksploatacijom i ne vrši redovna geološka istraživanja, ne izrađuje geološke planove i detaljne geološke karte, ne vodi knjigu evidencije i ne dostavlja godišnji izvještaj Ministarstvu (član 8. i član 31.);
- l) ako nakon završetka ili trajnog obustavljanja istražnih radova ne provodi mjere osiguranja ljudi i imovine, ako ne dovede zemljište u stanje prije izvođenja istražnih radova ili ne osposobi za korištenje u druge namjene u skladu sa odobrenjem za izvođenje geoloških istraživanja (član 40.);
- m) ako nakon završetka ili trajnog obustavljanja istražnih radova, ne obavijesti nadležni organ o provedenim mjerama sigurnosti i saniranja istražnog prostora (član 41.);
- n) ako eksploatisane količine mineralne sirovine ne nadomiri novoistraženim

- rezervama odgovarajuće kategorije i klase ili ne sačini elaborat o rezervama mineralne sirovine u propisanim rokovima (član 39.);
- o) ako Ministarstvu u propisanom roku ne dostavi na reviziju i ovjeru elaborat o klasifikaciji, kategorizaciji i proračunu rezervi mineralne sirovine na istražnom prostoru, odnosno eksploatacijskom polju (član 36. stav (1) i član 37. stav (1));
 - p) ako Federalnom zavodu za geologiju ne dostavi podatke o izvršenim geološkim istraživanjima (član 35.);
 - r) ako odobrenje za istraživanje i druga odobrenja izdata po ranijim propisima ne uskladi sa odredbama ovog Zakona u propisanom roku (član 61.).
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom u iznosu od 2.000 KM do 3.000 KM.
- (3) Za prekršaje iz stava (1) tačka a) do c) ovog člana uz novčanu kaznu izreći će se i :
- a) zaštitna mjera oduzimanja predmeta koji su upotrijebljeni ili su bili namijenjeni za izvršenje prekršaja, ili su nastali izvršenjem prekršaja ili kad postoji opasnost da će se takvi predmeti ponovno upotrijebiti za počinjenje prekršaja bez obzira na to da li su u vlasništvu počinioca;
 - b) mjera oduzimanja imovinske koristi pribavljene izvršenjem prekršaja.
- (4) Imovinskom koristi iz stava (3) tačka b) ovog člana smatra se tržišna vrijednost mineralne sirovine dobivene nelegalnom eksploatacijom.
- (5) Za prekršaje iz ovog člana mogu se izreći zabrane odgovornom licu da obavlja određene dužnosti u trajanju od jednog do šest mjeseci.

Član 58.

(Prekršaji privrednog društva ili javne ustanove koja je registrovana za obavljanje djelatnosti iz oblasti geoloških istraživanja)

- (1) Novčanom kaznom od 5.000 KM do 15.000 KM kaznit će se za prekršaj pravno lice:
- a) ako vrši izradu i reviziju geološke dokumentacije i izvođenje istražnih geoloških radova a nema odobrenja za obavljanje djelatnosti i odobrenja za upotrebu opreme za istraživanje (član 17. i 18.);
 - b) ako je poslove izrade projektne, tehničke i druge dokumentacije za geološka istraživanja povjerilo licima koja ne ispunjavaju propisane uslove (član 16.);
 - c) ako izradu geološke dokumentacije ne vrši u skladu sa ovim Zakonom (član 14. i član 15.);
 - d) ako detaljna geološka istraživanja tla za građenje stambenih i drugih građevinskih objekata za čiju su izgradnju propisana obavezna geološka istraživanja obavlja bez odobrenja Ministarstva (član 15. stav (3));
 - e) ako geološka dokumentacija ili dio geološke dokumentacije za koji je proveo kontrolu i dao pozitivan izvještaj ne zadovoljava zahtjeve iz ovoga Zakona (član 17. stav (3));
 - f) ako ne izvodi geološka istraživanja u skladu sa ovim Zakonom (član 29.);
 - g) ako ne pribavi odobrenje za istraživanje novootkrivene mineralne sirovine u odobrenom eksploatacijskom polju (član 32.);
 - h) ako ne postupi po rješenju geološkog inspektora (član 48.);

- i) ako ne omogući inspektoru vršenje inspeksijskog nadzora (član 46.).
- (2) Za prekršaj iz stava (1) ovog člana kaznit će se i odgovorno lice u pravnom licu novčanom kaznom u iznosu od 1.000 KM do 3.000 KM.

Član 59. (Prekršaji revidenta)

(1) Novčanom kaznom od 1.000 KM do 3.000 KM kaznit će se za prekršaj revident ako:

- a) obavlja reviziju geološke dokumentacije, a ne ispunjava uslove u skladu sa ovim Zakonom (član 16. stav (3));
- b) obavi reviziju geološke dokumentacije u čijoj je izradi učestvovao ili ako je geološku dokumentaciju izradilo ili nostrificiralo privredno društvo ili javna ustanova kod koje je zaposlen (član 17. stav (2));
- c) geološka dokumentacija ili dio geološke dokumentacije za koji je proveo kontrolu i dao pozitivan izvještaj ne zadovoljava zahtjeve iz ovoga Zakona (član 17. stav (3)).

(2) Uz kaznu za prekršaj iz stava (1) ovog člana licu koje obavlja kontrolu geološke dokumentacije, odnosno revidentu može se izreći zaštitna mjera oduzimanja prava za izradu odnosno kontrolu geološke dokumentacije u trajanju od tri do šest mjeseci.

(3) Lice koje je vršilo kontrolu geološke dokumentacije (revident) u slučaju iz stava (1) ovog člana dužno je investitoru nadoknaditi štetu u skladu s posebnim zakonom.

POGLAVLJE XIII - PRELAZNE I ZAVRŠNE ODREDBE

Član 60. (Postupci koji su započeti prije stupanja na snagu ovog Zakona)

Postupci koji su započeti prije stupanja na snagu ovog Zakona okončat će se po propisima koji su bili na snazi na dan podnošenja zahtjeva.

Član 61. (Usklađivanje ranijih odobrenja)

Privredna društva kojima su odobrenje za izvođenje geoloških istraživanja, kao i ostala odobrenja koja se izdaju na osnovu ovog Zakona, izdata po ranijim propisima, dužna su ih uskladiti sa odredbama ovog Zakona u roku od šest mjeseci od dana stupanja na snagu ovog Zakona.

Član 62. (Usaglašavanje registracije privrednih društava i javnih ustanova)

Privredna društva ili javne ustanove registrovana za geološka istraživanja, projektovanje, izvođenje istraživanja i revizije projektne dokumentacije dužna su usaglasiti registraciju sa odredbama ovog Zakona u roku od 12 mjeseci od dana stupanja na snagu ovog Zakona.

Član 63.
(Primjena postojećih propisa)

Do donošenja novih propisa i pravilnika, primjenjivaće se slijedeći propisi:

- a) Zakon o jedinstvenom načinu utvrđivanja, evidentiranja i prikupljanja podataka o rezervama mineralnih sirovina, podzemnih voda i o bilansu tih rezervi ("Službeni list RBiH", br. 8/93 i 13/94);
- b) Pravilnik o klasifikaciji i kategorizaciji rezervi pojedinih mineralnih sirovina i vođenju evidencije o njima ("Službeni list SFRJ", broj 53/79);
- c) Pravilnik o načinu i programu polaganja stručnog ispita radnika geološke struke ("Službeni list RBiH", broj 16/93,13/94);
- d) Pravilnik o sadržini programa, projekata i elaborata geoloških istraživanja ("Službeni list RBiH", broj 16/93);
- e) Pravilnik o vođenju zbirke isprava i katastra istražnih prostora i eksploatacijskih polja ("Službeni list RBiH", broj 16/93, 13/94).

Član 64.

Akte predviđene članom 9, 10. i 13. Zakona, Vlada i Ministarstvo donijet će u roku od 3 (tri) mjeseca od dana stupanja na snagu ovog Zakona.

Član 65.
(Prestanak važenja zakona)

Danom stupanja na snagu ovog Zakona prestaje primjena Uredbe sa zakonskom snagom o geološkim istraživanjima ("Službeni list R BiH", br. 3/93 i 13/94) i Uredbe o primjeni Zakona o geološkim istraživanjima za vrijeme rata ili neposredne ratne opasnosti („Narodni list HZ HB“, broj:5/93) na području Hercegovačko – neretvanskog kantona.

Član 66.
(Stupanje Zakona na snagu)

Ovaj Zakon stupa na snagu osmog dana od dana objavljivanja u "Službenim novinama Hercegovačko – neretvanskog kantona".

Bosna i Hercegovina
Federacija Bosne i Hercegovine
HERCEGOVAČKO-NERETVANSKI KANTON
S K U P Š T I N A
Broj:02-01-IX-161/11
Mostar, 19.12.2011. godine
PREDSJEDAVAJUĆI
Ramiz Jelovac,s.r.

Hercegovačko-neretvanske županije

(4) Ukoliko se uvjet iz stavka (3) ovog članka ne ispuni, za predmete koncesije iz stavka (1) ovog članka raspisat će se javni poziv za dodjelu koncesije sukladno ovom Zakonu.

Članak 63.

Za procesna pitanja koja nisu uređena ovim Zakonom ili drugim propisom odgovarajuće se primjenjuju odredbe ZUP-a.

Članak 64.

(1) Za rješavanje sporova nastalih u postupku primjene suprotno odredbama ovog Zakona nadležan je Kantonalni sud u Mostaru.

(2) Za rješavanje sporova nastalih između koncesora i koncesionara koji nastanu u vezi provođenja i/ili tumačenja odredaba ugovora o koncesiji nadležan je Općinski sud u Mostaru.

(3) Ugovorne strane mogu ugovoriti nadležnost arbitraže pri Gospodarskoj komori ili neke druge domaće arbitraže, a ako je koncesionar strana pravna osoba i nadležnost strane arbitraže.

Članak 65.

Svi postupci za dodjelu koncesije koji do dana stupanja na snagu ovog Zakona nisu okončani završit će se po odredbama ovog Zakona s pravom prvenstva razmatranja.

Članak 66.

Provedbeni propisi predviđeni ovim zakonom trebaju se donijeti u roku od tri mjeseca od stupanja na snagu ovoga Zakona.

Članak 67.

Do donošenja novih provedbenih propisa prema odredbama ovog Zakona, primjenjivat će se slijedeći propisi:

- a) Uredba o postupku za dodjelu koncesija ("Narodne novine HNŽ", broj: 3/04);
- b) Naputak o sadržaju i načinu vođenja registra ugovora o koncesijama ("Narodne novine HNŽ", broj: 3/04);
- c) Odluka o utvrđivanju visine naknada za koncesije za eksploataciju mineralnih sirovina na području Hercegovačko – neretvanske županije ("Narodne novine HNŽ", broj: 12/08 i 4/09).

Članak 68.

Danom stupanja na snagu ovog Zakona prestaje važiti Zakon o koncesijama ("Narodne novine HNŽ", broj: 2/03 i 1/06).

Članak 69.

Ovaj Zakon stupa na snagu osmog dana od dana objave u " Narodnim novinama Hercegovačko – neretvanske županije ".

Bosna i Hercegovina
Federacija Bosne i Hercegovine
Hercegovačko-neretvanska županija-kanton
S K U P Š T I N A

Broj: 02-01-XXI-276/12
Mostar, 15.01.2013. godine

P R E D S J E D A V A T E L J
Ramiz Jelovac, v.r

2

Na temelju članka 39. Ustava Hercegovačko-neretvanske županije („Narodne novine HNŽ“, broj: 2/98, 4/00 i 7/04), Skupština Hercegovačko-neretvanske županije je na sjednici održanoj dana 10.01.2013. godine, donijela

Z A K O N
O IZMJENAMA I DOPUNAMA ZAKONA
O GEOLOŠKIM ISTRAŽIVANJIMA
HERCEGOVAČKO-NERETVANSKE
ŽUPANIJE

Članak 1.

U Zakonu o geološkim istraživanjima Hercegovačko-neretvanske županije („Narodne novine HNŽ“, broj: 7/11), u članku 13., u naslovu članka, riječi: „i geoloških pojava“ brišu se.

U članku 13. stavak (3), zarez (,) i riječi: „ležišta mineralne sirovine i katastra geoloških pojava“ brišu se.

Članak 2.

U članku 20. stavak (2) točka c), riječi: „ministarstva za prostorno uređenje“ zamjenjuju se riječju: „organa“.

Članak 3.

Iza članka 22. dodaje se novi članak 22.a koji glasi:

„Članak 22.a

(1) U slučaju da zahtjev za odobrenje za izvođenje geoloških istraživanja na istom istražnom prostoru za istu vrstu istraživanja i istu mineralnu sirovinu podnese dva ili više gospodarskih društava – investitora, svi će se zahtjevi jednako razmatrati.

Hercegovačko-neretvanske županije

(2) Ukoliko su podnositelji zahtjeva iz stavka (1) ovog članka ispunili uvjet iz članka 20. stavak (1) i (2) i članka 22. stavak (1) ovog Zakona, Ministarstvo će zakazati usmenu raspravu, sukladno članku 22. stavak (2), (3) i (4) na koju će pozvati sve podnositelje zahtjeva.

(3) Na usmenoj raspravi podnositelji zahtjeva se imaju pravo izjasniti žele li sporazumno riješiti o pravu izvođenja geoloških istraživanja, a ukoliko ne postignu sporazum, Ministarstvo će odobrenje za istraživanje izdati onom gospodarskom društvu-investitoru koji podnesenim zahtjevom osigurava brže i djelotvornije istraživanje.

(4) Djelotvornost istraživanja ocjenjuje se na temelju programa ili projekata geoloških istraživanja, posebno sa stanovišta cjelovitosti istraživanja, racionalnosti, učinkovitosti istražnih metoda.

Članak 4.

U članku 55. stavak (4) riječi: „iz stavka (4)“ zamjenjuju se riječima: „iz stavka (3)“.

U članku 55. stavak (6) mijenja se i glasi:

„(6) Protiv rješenja inspektora o usmeno određenoj upravnoj mjeri iz članka 52. i 53. ovog Zakona i rješenja Ministarstva donesenog po žalbi iz stavka (3) ovog članka može se pokrenuti upravni spor.“

Članak 5.

U članku 57. stavak (1) točka a), u zagradi, između riječi: „članak 25. i članak 26.“ umjesto slova „i“ stavlja se zarez (,), te se iza riječi: „članak 26.“ dodaju riječi „i članak 32.“.

U članku 57. stavak (1) točka f) briše se.

Dosadašnje točke od g) do r) postaju točke od f) do p).

U članku 57. stavak (1) iza točke p) dodaju se točke r), s) i š) koje glase:

„r) ako se ne izvodi geološka istraživanja sukladno ovom Zakonu (članak 29.)

s) ako ne postupi po rješenju geološkog inspektora (članak 48.)

š) ako ne omogući inspektor vršenje inspekcijskog nadzora (članak 46).“

Članak 6.

U članku 58. stavak (1) točka d) briše se.

U članku 58. stavak (1) točka f) briše se.

U članku 58. stavak (1) točka g) briše se.

Dosadašnje točke od e) do i) postaju točke od d) do f).

Članak 7.

Ovaj Zakon stupa na snagu osmog dana od dana objave u „Narodnim novinama Hercegovačko-neretvanske županije“.

Bosna i Hercegovina

Federacija Bosne i Hercegovine

HERCEGOVAČKO-NERETVANSKA ŽUPANIJA

S K U P Š T I N A

Broj: 02-01-XX-405/12

Mostar, 10.01.2013. godine

P R E D S J E D A V A T E L J

Ramiz Jelovac, v.r.

3

Na temelju članka 39. Ustava Hercegovačko-neretvanske županije („Narodne novine HNŽ“, broj: 2/98, 4/00 i 7/04), Skupština Hercegovačko-neretvanske županije je na sjednici održanoj 10.01.2013. godine, donijela

ZAKON

O IZMJENAMA I DOPUNI ZAKONA O UGOSTITELJSKOJ DJELATNOSTI

Članak 1.

U Zakonu o ugostiteljskoj djelatnosti („Narodne novine HNŽ“, broj: 3/11), u članku 44. stavak 1. mijenja se i glasi:

„Fizička osoba koja pruža usluge u kućanstvu ne može biti poslodavac, niti koristiti rad osoba koje nisu članovi njegovog kućanstva.“

Članak 2.

U članku 45. iza stavka 4. dodaje se stavak 5. koji glasi:

„Fizička osoba koja pruža usluge u kućanstvu može obavljati ugostiteljsku djelatnost kao dopunsko zanimanje, ako ispunjava uvjete iz stavka 2. ovog članka i ako već ima zasnovan radni odnos po bilo kom temelju i ukoliko posebnim zakonom nije drukčije propisano.“

Članak 3.

U članku 61. stavak 1., u drugom redu, riječi „županijskom tijelu“ zamjenjuju se riječima „mjerodavnom županijskom inspektor“.

U stavku 2., u trećem redu, riječ: „Ministarstvu“ zamjenjuje se riječju: „ministru“.